



Ina gronda stgatla da chartun è bain il pli bel giugaret. Flurin e Cyril fan lien da sa zuppar e da sa dumagnar.



Armon ed Ava giandan da tadlar l'istorgia da Barbapapa che Ursina Aeberhardt-Gaudenz raquinta.

Babs s'engaschan per pops e pignuchels – e per lur lingua

La canorta rumantscha a Turitg ha avert sias portas

DA CLAUDIA CADRUVI / ANR

■ **Tschintg umens investeschan temp, daners ed anim cun tutta persvasiun. Ed uss datti ella – la canorta rumantscha a Turitg. Ina giada l'emna s'occupan trais educaturas rumantschas dals pignuchels che creschan si en la Bassa ed emperdan la lingua da lur babs.** L'emprim èsi stà in'idea tranter babs a la maisa radunda. Uss èsi realitad. Betg lunsch davent da la staziun Stadelhofen a Turitg sa chatta la canorta. Mintgamai il glindesdi vegnan ils geniturs cun pops e pignuchels en la canorta. Là han ils uffants la chaschun dad udir e discurren la lingua paterna u materna ordaifer la famiglia.

Il glindesdi passà han ils iniziants organisà ina conferenza e las medias han dastgà dar in tschit: Trais uffants sa zuppan en ina stgatla da cartun e fan cucu, in pitschen guarda il cudesch Barbapapa ed ina mattina runa sia poppa dapertut enturn. Igl è ina canorta sco tut las autras – be ch'i vegn halt discurren rumantsch amez la citad da Turitg.

Trais mussadras da differents idioms «Nus essan tschintg umens rumantschs. Nus avain tuts gi il cletg da chattar ina dunna en la Bassa», raquinta cun in sur-

rir *Remo Pfister*, president da la canorta. Sco babs hajan els svelto sa fatg en ch'i saja grev da dar vinavant la lingua sche mo in dals geniturs discurren rumantsch. Uschia saja naschida la primavaira 2015 l'idea per ina canorta.

In onn pli tard ha quella gia avert sias portas: mintga glindesdi da la 07.30 en fin las 18.00. Tut tenor la vegliadetgna dals uffants hai plaz per fin 12 uffants. Uffants da tuts idioms èn bainvegnids. Per gliez ha la canorta aposta engaschè mussadras da differents idioms. Da preschent èn quai *Ursina Aeberhardt-Gaudenz*, *Tamara Hendry-Monn* e *Margrit Rüttimann-Cavegn*.

Dapli uffants e dapli personal

Uss èn occupads set plazs. Trais ulteriurs uffants èn annunziads. «Nus duvrain anc in uffant e lura fissan nus plain», di *Remo Pfister*. Dad ina vart è el satisfatg dal success. Da l'autra vart fa el attent che la situaziun midia svelto: Sco ch'in uffant va a scoletta sorta el gia da la canorta. Perquai èsi necessari d'avair ulteriuras annunzias ed ina glista da spetga cun uffants interessads.

Betg per nagut han ils iniziants concepì ina carta da reclama cun il motto «fagei affons!» Vid la carta è fermà in pariser – perfurà cun bostich per far la segira. La



In bun motto: Per garantir la cuntinuitad d'ina canorta dovri dentant era personal e sponsurs.

FOTOS C. CADRUVI

finamira è gea da schlargiar la purschida ed avrir la canorta anc in segund di. Per gliez dovri dentant dapli uffants.

Era d'avair avunda personal n'è betg uschè simpel. I dovria permanentamain trais collavuraturas che s'occupan dals uffants, di *Pfister*. Da preschent saja ina collavuratura en speranza. «Quai è sa chapescha bun, i dat in pop rumantsch dapli.» Ma per segirar la surveglianza èsi

scrit or ina piazza da ventg pertschient per ina educatura «tuttina da tge idiom».

Fundà in'uniun – era per recaltgar daners

Per insomma pudair metter en pe la canorta han ils babs fundà l'atun passà l'Uniun canorta rumantscha Turitg. Lezza procura per la finanziaziun da basa e surpiglia il defizit dal manaschi uschè

ditg sco ils plazs n'èn betg occupads. Damai ch'il maun public na contribuescha fin uss nagut èsi da tschertgar sponsurs. Plinavant fa l'uniun reclama tar famiglias rumantschas.

L'uniun na po sa chapescha betg senza organisar la canorta ed ha chattà per gliez ina partenaria che posseda l'esperienza e l'infrastructura necessaria. I sa tracta da la Fundaziun GFZ (Gemeinnützige Frauen Zürich) che s'engascha dapi passa tschient onns per famiglias ed uffants e che posseda pliras canortas en la citad. Il manader da la GFZ *Martin Käser* ha ditg il glindesdi a las medias che sia fundaziun saja adina stada averta per purschidas innovativas e ch'ins saja cuntent da contribuir a la promoziun da la lingua rumantscha.

Urs Cadruvi: «Grondius!»

«Grondius», ha il secretari da la Lia Rumantscha *Urs Cadruvi* numnà tant il project sco era l'engaschament. Ils babs hajan stuì prestar in maraton per metter en pe la canorta.

La Lia Rumantscha porschia maun cun in emprist senza tschains, cun cudeschs e cun servetschs da communicaziun.